

Morning Regional Dogri News Bulletin, 15 August 2024

मार्निंग डोगरी न्यूज बुलेटिन, समें. 09.20 Hrs

<><><><><><>

Headlines

- 1- प्रधानमंत्री नरेंद्र मोदी होरें स्वतंत्रता दिवस पर लाल किले थमां राष्ट्र गी संबोधित कीता।
- 2- उपराज्यपाल मनोज सिन्हा होरें श्रीनगर ते सलाहकार आर.आर भटनागर होरें जम्मू च स्वतंत्रता दिवस समारोहें दी अध्यक्षता कीती।
- 3- रक्षा मंत्री होरें जम्मू-कश्मीर च आतंकवादिएं खिलाफ सख्त कार्रवाई करने लेई आखेआ ऐ।
- 4 डोडा च अस्सर दे जंगलें च जारी टाक्करे च सेना दा इक कैप्टन शहीद होई गोआ। टाक्करे च इक आतंकवादी मारेया गोआ ऐ।
- 5 श्री अमरनाथ जी यात्रा दी पवित्र छड़ी गुफा च पुज्जने कन्नै गै इस बरे दी सलाना यात्रा सम्पन्न होई जाग।

<><><><><><>

PM-Independence Day

स्वतंत्रता दिवस पर प्रधानमंत्री नरेंद्र मोदी होरें अज्ज बड्डलै लाल किले दे कोटै थमां राष्ट्रगी संबोधित कीता। उनें विश्वास प्रकट कीता जे 2047 तककर सब्बनें अइचनें गी दूर करिए विकसित भारत कायम करी लैता जाग। उनें आखेआ जे 140 करोड़ देशवासी जेकर पक्के इरादे कन्ने विकसित भारत बनाने आहली दिशा च लग्गी जान तां एह लक्ष्य सखल्ला होई जाग। उनें

आखेआ जे उंदी सरकारै राष्ट्र प्रथम आहली नीति तैहत केई सुधार कीते न। उनें आखेआ जे विकसित भारत लेई बड़ी मेहनत कन्ने कम्म होआ रदा ऐ ते देश दे करोड़ें लोकें थमां सुझा लैते जा'रदे न। विकसित भारत 2047 लेई अनगिनत सुझा, देश दे नागरिकें थमां हासिल होने करी ओह बड़े खुश न। एहदे शा पैहले प्रधानमंत्री होरें ऐतिहासिक लाल किले पर राष्ट्रीय झंडा चाढ़ेया ते सलामी दस्ते दा निरीक्षण कीता। अपने भाषण च प्रधानमंत्री होरें आखेआ जे राष्ट्र हर इक बलिदानी ते स्वतंत्रता सेनानी दा ऋणि ऐ ते अज्ज उनेंगी नमन करने दा दिन ऐ जिनें राष्ट्र गी बचाने च समर्पण कीता ते पूरे इरादे कन्ने देश गी नमी उंचाइए तक्क पुजाया।

<><><><><><>

JK-Celebration

लेफ्टिनेंट गवर्नर मनोज सिन्हा होरें 78में स्वतंत्रता ध्याड़े पर श्रीनगर दे बखशी स्टेडियम च लग्गे दे प्रोग्राम दी प्रधानता कीती जदकि उंदे सलाहकार आर.आर भटनागर होरें जम्मू दे मौलाना आजाद स्टेडियम च लग्गे दे समारोह च सलामी लैती। उनें राष्ट्रीय झंडा चाढ़ेया ते लोकें गी संबोधित कीता। इस बरे आजादी आहले ध्याड़े दा विषय ऐ विकसित भारत @2047

<><><><><><>

President

राष्ट्रपति द्रौपदी मुर्मू होरें आखेआ ऐ जे भारत बन्न-सबन्नता च एकता दी अपनी भावना कन्ने इक्कजुट होइयै अग्गे बदा करदा ऐ। सामाजिक फर्कोफर्की गी बढ़ावा देने आहली परानी प्रथाएं गी नकारने दा समां आई गेआ ऐ। आजादी आहले ध्याड़े कोला पैहली संझा राष्ट्र दे नां अपने संबोधन च राष्ट्रपति होरें आखेआ जे समावेश दी भावना देश दे सामाजिक जीवन दे हर इक्क

पैहलू च समाई दी ऐ। उनें इस गल्ला पर जोर दिता जे समावेश दे साधन दे तौर पर खरी कारवाइयें गी मजबूत करना लोड़चदा ऐ। राष्ट्रपति होरें आखेआ जे सामाजिक न्या सरकार दी प्राथमिकता ऐ। आर्थिक तरक्की दा जिक्र करदे होई राष्ट्रपति होरें आखेआ जे 8 फीसदी दे औसत सालाना आर्थिक बाद्दे कन्नै भारत दुनिया दी सब्बनें कोला तेज गति कन्ने बदने-मठोने आहली अर्थ बवस्था बनी चुकी दी ऐ। उनें आखेआ जे सरकार नै इस बरे जुलाई सवां भारतीय न्या संहिता गी अपनाइयै औपनिवेशिक युग दे इक्क होर अवशेष गी घट्ट करी दिता ऐ।

<><><><><><>

LG-Day

लेफ्टिनेंट गवर्नर मनोज सिन्हा होरें स्वतंत्रता ध्याड़े दे मौके पर लोकें गी ममारखां दितियां न। उनें आखेआ जे 78में आजादी आहले ध्याड़े पर में जम्मू-कश्मीर दे लोकें गी दिल दी गहराइयें कन्नै शुभकामनां दिन्नां। उनें आजादी लेई अपना बलिदान देने आहले स्वतंत्रता सैनानियें गी बी श्रद्धांजलि भेंट कीती। उनें राष्ट्र दे एकता दी हिफाजत ते आतंकवाद कन्नै लड़ाई च अपनी जिंद कुर्बान करी देने आहले जम्मू-कश्मीर पुलिस दे जवानें, हथियारबंद बलें, फौज ते केंद्रीय हथियारबंद पुलिस बलें दे शहीदें गी बी श्रद्धांजलि दिती।

<><><><><><>

President-Medals

राष्ट्रपति द्रौपदी मुर्मू होरें आजादी आहले ध्याड़े कोला पैहली संझा हथियारबंद बलें ते केंद्रीय हथियारबंद पुलिस बलें दे कर्मियें गी 103 बहादुरी पुरस्कार देने दी मंजूरी दिती ऐ। इंदे च 4 कीर्ति चक्र न जेड़े 3 मरणोपरांत दिते जा करदे न, 18 शौर्य चक्र न जिंदे चा चार मरणोपरांत

दिते जा करदे न। इक्क बार टू सेना बहादुरी पुरस्कार बी शामिल ऐ। बहादुरी पुरस्कारें च 63 सेना वीरता मेडल न, जिंदे चा 2 मरणोपरांत न। 11 नौसेना वीरता मेडल न ते 6 वायु सेना वीरता मेडल शामिल न।

<><><><><><>

Kirti-Chakra

देश दा दुआ सर्वोच्च शांति दे समय दा वीरता पुरस्कार कीर्ति चक्र कर्नल मनप्रीत सिंह होरें गी प्रदान कीता गेआ ऐ जिनें पिछले बरे सितंबर च अनंतनाग जिले च आतंकवाद विरोधी अभियान दा नेतृत्व करदे होई प्राणदान दिता। त्रै होर सुरक्षाकर्मिणं राइफलमैन रवि कुमार मरणोपरांत, मेजर मल्लराम गोपाल नायडू, जम्मू कश्मीर पोलीस दे डीएसपी हुमायू मुजम्मिल भट्ट मरणोपरांत गी बी कीर्ति चक्र कन्नै सम्मानित कीता गेआ ऐ। कर्नल सिंह होर इक अनुभवी सेनाधिकारी हे जिनें 19 राष्ट्रीय राइफल दी सेकंड इन कमांड दे अपने कार्यकाल च सेना मेडल बी हासिल कीता हा। डीएसपी भट्ट होरें बी इस्सै अभियान च शहादत पाई। स्वतंत्रता दिवस दी पूर्व संध्या पर राष्ट्रपति द्रौपदी मुर्मू होरें सशस्त्र बलें ते केंद्रीय सशस्त्र पोलीस बलें दे कर्मियें लेई 103 वीरता पुरस्कारें दी घोषणा कीती। रक्षा मंत्रालय मुजब 4 कीर्ति चक्र, 18 शौर्य चक्र, इक बार टू सेना मेडल, 63 सेना मेडल, 11 नौसेना मेडल ते 6 वायु सेना मेडल घोषित कीते गेन। राष्ट्रपति होरें बक्ख-बक्ख सैनिक अभियानें च महत्वपूर्ण भूमिका आस्तै आर्मी डाग कैंप सने 39 Mention in Despatches गी बी मंजूरी दिती। इनें अभियानें च ऑपरेशन रक्षक, आपरेशन स्नो लेपर्ड, आपरेशन सहायता, आपरेशन हिफाजत, आपरेशन Orchid ते आपरेश कच्छल शामिल न।

<><><><><><>

Rajnath Singh JK

रक्षा मंत्री राजनाथ सिंह होंरें जम्मू संभाग दे बक्ख-बक्ख पहाड़ी इलाकें च आतंकवादी घटनाएं च बाद्दे गी दिक्खदे होई कल्ल सुरक्षा एजेंसिएं दे अधिकारिएं कन्नै इक जायजा मीटिंग लाई। इस मीटिंग च बन्ने पारा होने आहली घुसपैठ गी रोकने ते बक्ख-बक्ख पहाड़ी इलाकें च छप्पे दे आतंकवादिएं गी खत्म करने लेई रणनीति पर सोच-विचार कीता गेआ। राष्ट्रीय सुरक्षा सलाहकार अजीत डोबाल, सेना प्रमुख जनरल उपेंद्र द्विवेदी ते सुरक्षा एजेंसिएं दे प्रमुख राष्ट्रीय राजधानी च लग्गी दी इस मीटिंग च शामिल हे। सीनियर अधिकारियें पिछले किश समें च जम्मू क्षेत्र च घुसपैठ करी आए दे विदेशी आतंकवादिएं दी गिनतरी समेत हालात बारे जानकारी दिती। रक्षा मंत्री होंरें फौज गी सख्त तैय मानक कार्रवाई संचालन प्रक्रिया अपनाने ते आतंकवादियें खलाफ सख्त कार्रवाई करने लेई आखेआ।

<><><><><><>

Assar-Encounter

जम्मू-कश्मीर दे डोडा जिले दे अस्सर इलाके च बुधवार सवां चला करदे इक्क टाकरे च सेना दे इक्क कैप्टन शहीद होई गेन ते इक्क आतंकवादी मारेआ गेआ ऐ। इक्क नागरिक बी इस घटना च घायल होई गेआ ऐ जिसी इलाज लेई अस्पताल भर्ती कराया गेआ ऐ। अधिकारियें मताबक सुरक्षा बलें डोडा जिले दे सीनो जंगलें च 26 जून गी त्रुं आतंकवादियें गी मारी मकाने दे 49एं दिनें मगरा इक्क होर आतंकवादी गी मारने च कामयाबी हासिल कीती ऐ। उयां कार्रवाई दी अगुवाई करदे होई फौज दे इक्क नौजवान कैप्टन दीपक सिंह शहीद होई गे।

<><><><><><>

Amarnath-Yatra

श्री अमरनाथ जी द 52 दिन तोडी चलने आहली इस बरे दी सालाना यात्रा हून सम्पन्न होने आहली ऐ कीजे साधू-महंत पवित्र छड़ी शोभा यात्रा लेइयै पवित्र गुफा च पुज्जा करदे न। छड़ी मुबारक जेड़ी भगवान शिव दा प्रतीक ऐ, एहदी शोभा यात्रा श्रीनगर सवां अमरनाथ गुफा लेई शुरू होई ही। इस बरे दी यात्रा 29 जून गी शुरू होई ही ते 19 अगस्त गी रक्षा बंधन पूर्णमासी गी सम्पन्न होई जाग। हूनै तोड़ी 5 लकख 1 जहार श्रद्धालु यात्रा करी चुके देन। पवित्र छड़ी पारंपरिक रस्ते सवां औग। शोभा यात्रा पैहले पहलगाम च रूकोग, एहदे मगरा 16 अगस्त गी चंदनवाड़ी, 16 अगस्त गी शेषनाग ते 18 गी पंचतरनी च रूकोग। 19 अगस्त गी सौन म्हीने दी पूर्णिमा दे मौके पर पवित्र छड़ी शोभा यात्रा अमरनाथ जी दी गुफा च पुज्जोग।

<><><><><><>

Agriculture-Minister

केंद्री कृषि ते करसान कल्याण मंत्री शिवराज सिंह चौहान होर अज्ज नर्मी दिल्ली च स्वतंत्रता दिवस दे मौके पर नेशनल पोस्ट सर्विलेंस सिस्टम दा उद्घाटन करडन। इस प्रणाली गी देश दे करसाने दी सुविधा आस्तै शुरू कीता जा'रदा ऐ। एहदे कन्नै आधुनिक तकनीक दा इस्तेमाल करदे होई फसलें गी नुकसान पुजाने आहले कीड़ें ते परजीविणं पर निगरानी रक्खिये रोकथाम कीती जाग।

<><><><><><>

MHA-ECI

जम्मू-कश्मीर च विधानसभा चुनां लेई केंद्रीय गृह मंत्रालय नै भारतीय चुनां आयोग गी लोड़चदी सुरक्षा उपलब कराने दा यकीन दोआया ऐ। आयोग नै गृह सचिव अजय भल्ला हुंदे कन्नै इक बैठक च जम्मू-कश्मीर यू.टी च चुना लेई लोड़चदी सुरक्षा जरूरतें पर चर्चा कीती। सूत्रें मुजब सुरक्षाबलें दिआं 600 कंपनियां चुनां लेई तैनात होंगन। बैठक च केंद्री गृह सचिव अजय भल्ला, मुख् चुनां आयुत राजीव कुमार ते चुनां आयुक्त ज्ञानेश कुमार ते एस. संधू होर शामिल हे।

<><><><><><>

CS-PMAY

ग्रामीण विकास ते पंचायती राज विभाग आस्सेया प्रधानमंत्री ग्रामीण आवास योजना ते दुई स्कीमें गी मित्थे दे लक्ष्यें मुजब अमल च आनने आस्तै चीफ सैक्रेटरी अटल डुल्लू होरें निर्देश जारी कीते न। उनें आखेआ जे केंद्री स्कीमें च पैसे दी कोई कमी नेई ऐ ते विभाग गी बी मित्थे दे समें अंदर कम्म पूरे करने होंगन। उनें ग्रामीण आजीविका मिशन JKRLM गी ग्रामीण इलाकें च बने दे सेल्फ हेल्प ग्रुप्स दी समर्थ गी बरतने दी सलाह दिती।

<><><><><><>